



E CREACION DI E ESTATUA DI ANNE FRANK TA UN BERDADERO OBRA DI AMOR

MANERA a wordo anuncia anteriormente, Fundacion RESPETA BIDA...semper corda, Aruba pronto lo tin su mesun estatua pa conmemora e bida di Anne Frank, den curason di Wilhelmina Park. Como su prome proyecto grandi, e fundacion a pidi e artista Hulandes Joep Coppens, kende ta specialisa den obranan di brons, pa crea e estatua di Anne Frank. E fundacion a scoge Anne Frank como un simbolo conmemorativo pa semper corda cu un holocaust por pasa atrobe, si un comunidad no sa con pa coexisti den paz. E estatua a wordo traha na Vlieden, un pueblo chikito na Hulanda, unda e artista tin su studio. E creacion di e estatua a tuma algun luna, ya cu e ta consisti di shete etapa principal. E proceso cu ta wordo uza pa Coppens pa crea estatuanan y esculturanan di brons awendia ta e mesun proceso cu a wordo uza den temponan anciano. Coppens a basa su trabou riba un modelo mas chikito, cual ta mustra Anne Frank sin sapato y para firme, cu su mannan mara y su cabes atras, cu bista pa e shelo. Na prome luga e mester a traha un estatua positivo, for di cual e por a traha "moldnan" negativo di e cabes, curpa, brasanan y pianan. For di e "moldnan" aki e por a traha replicanan hol di wax, cualnan despues a wordo cubri den varios laag di un casca ceramico y seca den forno. Unabes cu nan a keda cla, e brons likido a wordo keinta te ora cu el a yega un temperatura di 2200 grado y a wordo basha den e cascanan y permiti pa fria. Ora e pisanan individual di brons a keda cla, nan a weld nan na otro, pa asina forma e estatua di Anne Frank. E estatua lo wordo desvela durante e bahada di solo riba dia 12 di Juni, cual ta e aniversario di e cumpleaños di Anne Frank. Coppens mes lo ta presente pa yuda cu e desvelo. Henter e comunidad ta invita tambe pa bin y participa den e ceremonia.

Fundacion RESPETA BIDA...semper corda a wordo funda pa salvaguardia derechonan di cada miembro di e sociedad Arubano; promove tolerancia, solidaridad, libertad y igualdad di cada concudadano; y lucha particularmente contra practicanan di: racismo, antisemitismo y xenofobia, cu por lanta cabes atrobe. E prome hunta di directiva di e fundacion ta consisti di: Sra. Diana Gonzalez-Pieters como presidente y Sr. Jose Fernandes Perna, vice-presidente; Sra. Martha Goldenberg-Lichtenstein como secretaria y Sr. Frank Williams, segundo secretario y Sra. Shereen de Cuba como tesorero.

E potretnan ta mustra e proceso tras di e creacion di e estatua di Anne Frank.

